




# ხაშურის მთაშუა



№1 (132)

8 იანვარი, ორშაბათი,

2018 წელი

## დედა, წა იყო ეს?

### პირობაშია თუ პირობაშია?

„დედა, რა იყო ეს?“ – დათა თუთაშხიას ცნობილი პერსონაჟის, ნიკანდრო ქირიას, ასევე ცნობილი სიტყვები აღმოჩნდა მეც ახალი წლის შემობრძანებასთან ერთად. თუმცა, ეს სიტყვები შედარებით გვიან იყო, თორემ 12 საათისთვის სიტყვების შერჩევითაა არა, თავის გადარჩენისათვის უფრო ვიბრძოდი. ნიკანდრო ქირიასი არ იყოს, ამ დროულ კაცს რა არ გადაამხდენია, მაგრამ მსგავსი არაფერი მინახავს. თითქოს მითიურმა ზევსმა დაატეხაო რისხვა ჩემს ქვეყანას და თავისი ცეცხლოვანი ისრები ყველა სახლისკენ მიმართა. სიმართლე გითხრათ, ბალისტიკური რაკეტების გაშვებას არასოდეს შევსწრებოვარ, მაგრამ, ვეჭვობ, მისი ხმა, თავისი დეცობალებით, აღმატებოდეს იმ ხმაურს, რაც ახალ წელს ხდებოდა. ისროდნენ ყველა სახლიდან, ყველა ორდობიდან, ყველა-ნაირი „კალიბრის იარაღიდან“ – დაწვეული თითისსიმსხოდან, დამთავრებული კანალიზაციის მილის მოყვანილობის „კატუშით“. დედა, რა იყო ეს? ვიღას ახსოვდა ახალი წელი? ჩემი სახლის სახურავისაკენ ათასობით მანათობელი ბურთულა ეშვებოდა და მეც წყლით სავსე ორ-ორი სათლით აქეთ-იქით დავრბოდი, რომ ხანძრის უბედურება ამეცილებინა თავიდან. ამ ჯოჯოხეთს უფრო დიდი ჯოჯოხეთი მაშინ მოყვა, როდესაც ყველას ამოეწურა „ტყვია-წამლის“ არსენალი და უცებ ისეთი მღუმარება ჩამოდგა, ვიფიქრე დავერუფდი-მეთქი. თოვლის ბაბუა და ანგელოზები ბუხრიდან ჩამოდიან სახლში და სიხარული, ბარაქა და ბედნიერება მოაქვთო.. მინდა, ეს სიმართლე იყოს, მაგრამ რომელი თოვლის ბაბუა და ანგელოზი გარისკავდა ამ ტყვიების ცეცხლში ჩვენს სახლებში შემოსვლას? ამ გაგანია „ომში“, ჩემი პატარა შვილიშვილისათვის



საჩუქრის დადება დამავიწყდა ნაძვის ხის ქვეშ და ბავშვი ერთი საათი ჩაბუქრებული იყო - ეტყობა თოვლის ბაბუა დაჭრეს და წავიდეთ ვუშველოთო, ძლივს მოვიყვანეთ გონზე.

კარგი, ვითომ ვხუმრობ რაღაცას, მაგრამ სულაც არ ვფიქრობ, რომ სახუმაროდა გვაქვს საქმე. ჯერ საშინელ სტატისტიკას გადავხედოთ – თბილისში 46 დასახიერებული (უმრავლესობა ბავშვები – მოწვევითი თითებით და კიდურითაც კი), ქუთაისში – 32, ბათუმში – 18, რუსთავეში – 22 და ა.შ. ფაქტობრივად, საქართველოში არ დარჩენილა არცერთი მუნიციპალიტეტი, სადაც სულ მცირე მასშტაბითაც არ მომხდარიყოს მსგავსი. ბოლო წლებია, საქართველოში სულ გაჭირვებაზე ვსაუბრობთ და ვინ უნდა დავაჯერო ამ ფაქტით? აგერ, სულ უხეში გათვლებითაც კი, რამდენიმე მილიონი ლარი შევათხლიშეთ ცას და ესაა გაჭირვება? რაღაც სიგიჟის ფორმა მიიღო ამ უმსგავსობამ და სამეზობლოში ფარული დაპირისპირებებიც კი დაიწყო, ვინ მეტს იყიდის პიროტექნიკას და ვისი სახლიდან მეტი ცეცხლი აიტყორცნება ცისკენ. მეღია კი ზის ბუჩქებში და იცინის და იცინის. მეღია რა? ჩინელები უნდა მეთქვა. ნახეს შტერი ერი, მიხვდნენ, რომ მთლად დალაგებულები არ ვართ, კანონმდებლობა ტაშს უკრავს და გვეტყვიან ყოველ წელს მილიონობით ლარის ამ უბედურებას. გაუსადებელი დარჩებათ რამე? დარჩებათ და ისევ არ მოვა ახალი წელი? მე თქვენ გეტყვით და რომელიმე ქართველი, პიროტექნიკის ყიდვის დროს, მის გამოშვების თარიღს აკვირდება. ან, აქვს ეს თარიღი საერთოდ? ჩვენი კანონმდებლები კი დუმან და ვეჭვობ, მათთვის არც ახალ წელს დაწვევითი ასეულობით თითი გახდეს რაიმე არგუმენტი. კარგი იქნება, ზედ ახალ წელს, დაიქირაგო ასი-ორასი კაცი, აღჭურვო მათ მიერ ნებადართული ამ „კატუშებით“ და მიუშვა პარლამენტის შენობაზე. ვეგებ მაშინ მაინც მოვიდნენ გონზე და რაღაც რეგულაციები შემოიღონ. მანამდე კი ვილოცოთ, რომ ეს შემთხვევითი თოვლის ბაბუა და ანგელოზები როგორმე შემოვირიგოთ და საჩუქრებთან ერთად, გონების გასახსნელი წამალი დაგვირიგოს ქართველებს, რომ მომავალ ახალ წელს მაინც აღარ ისმოდეს ბუჩქებიდან მეღიის სიცილი.

აფეთქებას და დაყრუებას გადარჩენილი გოგი გოგოლაძე

## საქველმოქმედო აქცია - მუნიციპალიტეტის მერის ინიციატივით

ხაშურის მუნიციპალიტეტის მერის ინიციატივით, მუნიციპალიტეტის მერიისა და საკრებულოს თანამშრომლებმა წინასახალწლო საქველმოქმედო აქცია გამართეს და მუნიციპალიტეტში მცხოვრები, უკიდურესად გაჭირვებული ოჯახები ტკბილეულით, პროდუქტით და საჩუქრებით გაახარეს.

საქველმოქმედო აქციაში პირადად იყვნენ ჩართულები მუნიციპალიტეტის



მერი გიორგი გურასპაშვილი, საკრებულოს თავმჯდომარე მიხეილ ჯანაშვილი, მუნიციპალიტეტის საკრებულოს წევრები, მერიისა და გამგეობის თანამდებობის პირები და თანამშრომლები.

აქციის ორგანიზატორი იყო ხაშურის მუნიციპალიტეტის მერიის განათლების, კულტურის და სპორტის სამსახური. ვეტერანების საქმეთა სახელმწიფო სამსახურმა კი ხაშურის მუნიციპალიტეტში მცხოვრები საქართველოს ტერიტორიული მთლიანობისთვის ბრძოლების მონაწილე ოთხი ვეტერანი საახალწლოდ პროდუქტითა და ტკბილეულით დაასაჩუქრა.

ვეტერანებს ნობათი მუნიციპალიტეტის ჯანმრთელობის დაცვისა და სო-



ციალური უზრუნველყოფის სამსახურის წარმომადგენლებმა გადასცეს. ხაშურის მუნიციპალიტეტის მერის ინიციატივით გამართულ საქველმოქმედო აქციას, რომლის მიზანიც გაჭირვებული ოჯახების დახმარება იყო, მუნიციპალიტეტის ა(ა)იპებიც შეუერთდნენ.



# საახალწლო ნობათი - საზღვრისპირა სოფლების პატივსაცემად

საახალწლო ნობათი და საჩუქრები გადაეცათ ხაშურის მუნიციპალიტეტის ე.წ. ადმინისტრაციული საზღვრისპირა სოფელ წაღვლის საჯარო სკოლის დაწესებულებების მოსწავლეებს და ალტერნატიული საბავშვო ბაღის აღსაზრდელებს. საჩუქრები ასევე მიიღეს მუნიციპალიტეტში მცხოვრებმა, მწვავე კრიზისულ მდგომარეობაში მყოფმა ოჯახებმა, დედათა და ბავშვთა თავშესაფარმა.

აქციაში, რომელიც ხაშურის მუნიციპალიტეტის მერიის, განათლების, კულტურის და სპორტის სამსახურის ორგანიზებით მოეწყო, პირადად მონაწილეობდნენ ხაშურის მუნიციპალიტეტის მერი გიორგი გურასპაშვილი, მერის მოადგილეები, საკრებულოს თავმჯდომარე მიხეილ ჯანაშვილი, საკრებულოს დეპუტატები და კულტურის სამსახურის წარმომადგენლები.

ღონისძიება „ხაშურის მუნიციპალიტეტის მერიის ინიციატივით, სისტემატურად იმართება.



## კეთილი საქმე არ იკარგება

„ქალთა ასოციაციის“ დაფუძნებიდან სულ რაღაც სამი წელი გავიდა. ორგანიზაციამ, ნატო ღონდაძის ხელმძღვანელობით, არასამთავრობო ორგანიზაციებთან ერთად, სათანამშრომლოდ, რაიონის ხელმძღვანელი სტრუქტურები და ფართო საზოგადოება ჩართო სასიკეთო საქმიანობაში.

ქველმოქმედ, სიკეთით სავსე ადამიანებს რა გამოლევს... ხაშურელი ქველმოქმედი ოჯახის, პავლე და გიული ლაცაბიძეების სახელთან ბევრი სასიკეთო საქმე ასოცირდება. ახალი წლის წინა დღეებში სწორედ მათგან



მივიღეთ შემოთავაზება, რომ მათი მხარდაჭერით სოციალურად დაუცველი ბავშვებისთვის დაბადების დღე აღგვენიშნა სადღესასწაულო ცენტრში.

სოციალურად დაუცველი მოსწავლეების მოძიებისას, აღმოჩნდა, რომ ჩვენმა სამწუხაროდ, ისინი არცთუ მცირენი არიან.

და აი, 24 დეკემბერს, სურამისა და ხაშურის საჯარო სკოლების სოციალურად დაუცველი ბავშვები, რომლებიც დეკემბრის თვეში არიან დაბადებული, მივიწვიეთ სადღესასწაულო ცენტრში, პედაგოგებთან, მშობლებთან, კლასელებთან ერთად.

განწყობამ, ემოციებმა, სიხარულმა მოლოდინს გადააჭარბა. დაუვიწყარი ბედნიერი დღე ვაჩუქეთ პატარებს, ქალბატონმა გიულიმ და ბატონმა პავლემ წინასწარ, ბავშვთა ასაკის გათვალისწინებით შექმნილი საჩუქრები გადასცეს მათ. სიურპრიზი მოგვიწყო პოეტმა ეკა ბაქრაძემ, მან თავისი ლექსების ახალი კრებული საჩუქრად უძღვნა პატარებს. სიურპრიზი იყო პატარებისთვის გიორგი ბაქრაძის, დემეტრე და მარიამ ღონდაძეების, დემეტრე კერესელიძის მიერ შესრულებული სიმღერები. სადღესასწაულო სუფრას პატარები უფროსებთან ერთად მიუსხდნენ და ამ სიკეთის უხვად გამცემი ოჯახის შემწევობით, არაჩვეულებრივი სამი საათი გაატარეს.

განვიღო პერიოდში, იყო რამდენჯერმე სტუმრობა მცირე საოჯახო ტიპის სახლის აღსაზრდელებთან, რომლებიც დაგამეგობრეთ ქვიშხეთის საჯარო სკოლის სამოქალაქო კლუბის წევრებს და მათთან ერთად გავმართეთ დისპუტი ადრეული ქორწინების მავნეობაზე.

ამავე სახლში, მოხალისე პედაგოგები, ყოველგვარი ანაზღაურების გარეშე, ამეცადინებდნენ სოციალურად დაუცველ მოსწავლეებს. ჩატარდა საქველმოქმედო საღამო ანა ფოცხვერაშვილის დასახმარებლად.

განათლების რესურსცენტრის, კულტურის სამსახურის, სპითპ-ს ხაშურის ორგანიზაციის ინიციატივით გამოცხადდა კონკურსი თვითნაკეთი ნაძვის ხეების დამზადებისთვის.

უმაღლესი შეფასება მიიღო მე-9 საჯარო სკოლის ხელოვნების პედაგოგისა და „ქალთა ასოციაციის“ წევრის ხათუნა ჩიტაძის მიერ დამზადებულმა დიდი ზომის ნაძვის ხემ, რომელიც საჩუქრად გადაეცა შინდარის უბანში მდებარე მცირე საოჯახო ტიპის აღსაზრდელებს. საპატიო სიგელით დაჯილდოვდნენ მე-6 საჯარო სკოლის მოსწავლეები, რომელთა მიერ ნაკეთები ნაძვის ხეები დაურიგდნენ სოციალურად დაუცველთა ოჯახებს და მიუსაფარ მოხუცთა სახლს და სასადილოს.

მერიის ხელმძღვანელთა მხარდაჭერით, განხორციელდა მეტად საჭირო და ძვირადღირებული პროექტი - ქალაქის სასაბურთო ბაღში, მათთვის გამოყოფილ ადგილზე, დამონტაჟდა ატრაქციონები შშმ ბავშვებისთვის, გახსნა სახეიმო ვითარებაში წარიმართა. „ქალთა ასოციაციის“ და პედაგოგ ხათუნა ღვალიძის ერთობლივი საქმიანობით, ჩაიწერა კლიპი ანსამბლ „ჯადოსნური ქალაქის“ მოსწავლეებთან ერთად. მადლობა დავით ღვინდუაშვილს, რომელმაც უფასოდ გაუკეთა საჩუქარი ბავშვებს.

ანსამბლ „ჯადოსნური ქალაქის“ ბავშვებმა ჩაატარეს საქველმოქმედო კონცერტი, შემოსული თანხა მოხმარდა შშმ ბავშვებს.

ცნობილია, რომ 21 მარტი ეს არის დაუნის სინდრომის მქონეთა საერთაშორისო დღე. „ქალთა ასოციაციას“ ყველა ასეთი ბავშვის ოჯახთან აქვს მეგობრობა. მოვიწვიეთ ასეთი ოჯახები და სადღესასწაულო ცენტრში მოგვწვიეთ მათ დიდი სამახსოვრო ზეიმი. დღესასწაულის ფინანსური მხარდაჭერა გაწიეს მაჟორიტარი დეპუტატის ოჯახმა, სიმონ ნოზაძემ და მარინა ხიმშიაშვილმა, პავლე ლაცაბიძემ და გიული ლაცაბიძემ.

„ქალთა ასოციაციის“ მეგობარია ხაშურის მე-2 საჯარო სკოლასთან არსებული შშმ ბავშვთა დღის მოვლის ცენტრი ირმა ცაბაძესთან, ეკა გურასპაშვილთან, მაკა ციყელაშვილთან, ქეთინო ლომიძესთან ერთად ორგანიზაცია მრავალ საქველმოქმედო ღონისძიებას ატარებს.

მაჟორიტარი დეპუტატის სიმონ ნოზაძის დახმარებითა და საქველმოქმედო კონცერტიდან შემოსული თანხით, დაფინანსდა დღის მოვლის ცენტრის აღსაზრდელის ნუცა ჩიტაძის ლექსების კრებული „აღუბლის ყვავილობა“, წიგნში შესულია მისი საუკეთესო ლექსები და ჩანახატები. წიგნის პრეზენტაციას ესწრებოდნენ ნუცას ოჯახის წევრები, მისი თანატოლები, წარმომადგენლები მუნიციპალიტეტიდან, რესურსცენტრიდან, სპითპ-ის ხაშურის რაიონული ორგანიზაციიდან და სხვადასხვა ორგანიზაციებიდან.

„ქალთა ასოციაციის“ მუდმივი მხარდამჭერია მისი დამფუძნებელი ქალ. ხათუნა ჩუგოშვილი და ორბელიანის ფონდი. ჩვენ ვაგრძელებთ სასიკეთო საქმეების კეთებას, იანვრის თვეში დაბადებულებს უკვე დავპირდით, რომ სადღესასწაულო ცენტრში მათ მეგობრებთან ერთად ვუმასპინძლებთ.

პატრიარქი, უწმინდესი და უნეტარესი ილია II გვმოდგვრავს: „გაუფრთხილდით ერთმანეთს... იცოდეთ წარსული უკან აღარასდროს დაბრუნდება. იცით რამდენ რამეს ვინანებთ? რამდენი რამის შეცვლა მოგვინდება, მაგრამ ამოდ, მათ სამუდამოდ წარსული მოგვტაცებს, წარსული, რომელიც ვეღარასოდეს გახდება აწმყო. გიყვარდეთ! გიყვარდეთ ერთმანეთი, რადგან ხვალ შეიძლება უკვე გვიანი იყოს. ყოველი წამი დააფასე! ზოგჯერ შეიძლება ის წამი ინატრო მთელი ცხოვრება...“

შემოგვიერთდით სასიკეთო საქმის კეთებაში, კეთილი საქმე არ იკარგება.

ინეზა ელისაშვილი „ქალთა ასოციაციის წევრი“

## საინფორმაციო შეხვედრა გარემოსდაცვითი საკითხებზე

საქართველოს გარემოსდაცვითი ინფორმაციისა და განათლების ცენტრის ორგანიზებით, პროექტის „გლობალური გარემოს მონიტორინგის გაუმჯობესებისა და მის შესახებ ცოდნის ამღვლეების მიზნით, ინფორმაციის მართვის პარმონიზება საქართველოში“ ფარგლებში, შიდა ქართლის რეგიონის მუნიციპალიტეტების (კასპი, გორი, ქარელი, ხაშური) საკრებულოსა და მერიის წარმომადგენლებთან საინფორმაციო შეხვედრა გაიმართა თემაზე: „გარემოსდაცვითი მართვა და გადაწყვეტილებები რიოს კონვენციების განხორციელების გაუმჯობესებული მონიტორინგისთვის“

საინფორმაციო შეხვედრა მიზნად ისახავდა რიოს სამი კონვენციით დაკისრებული მოვალეობებისა და მათი განხორციელების გზების თაობაზე ცნობიერების ამღვლეს.

საინფორმაციო შეხვედრის ფარგლებში, მონაწილეები გაეცნენ გლობალური თუ ლოკალური მასშტაბით არსებულ ისეთ ძირეულ გარემოსდაცვით საკითხ-

ებს, როგორცაა: კლიმატის ცვლილება, ბიომრავალფეროვნების კარგვა და გაუღაბნობა. ყურადღება გამახვილდა აღნიშნული საკითხების თაობაზე რიოს კონვენციების განხორციელების გაუმჯობესებული მონიტორინგისთვის, დაგეგმვისა და მონიტორინგის პროცესში გარემოსდაცვითი მართვის ინტეგრირების მნიშვნელობაზე.

ჯგუფური სამუშაოს ფარგლებში, მონაწილეებმა შეასრულეს პრაქტიკული დავალებები DPSIR ჩარჩო მეთოდის გამოყენებით და აქტიურად ჩაერთვნენ დისკუსიაში.



# ვიცნობდეთ ჩვენს საამაყო თანამემამულეებს

ნათქვამია: ზოგისა ბამბა ჩხრიალებს, ზოგის კაკალიც არაო. სრული ჭეშმარიტებაა! გაანჩია, ვის უჭირავს ხელში და ვის როგორი შანსი აქვს, მოაჩვენოს სპილენძი ოქროდ, ოქრო კი - სპილენძად ცვრას.

ადრე, ასეთ მომწვენილებზე ამბობდნენ, თვალეში ნაცრის ყრა ეხერხებო, კინტოაო, მატყურააო და ა.შ. კანონმა კი თაღლითები შეარქვა და თაღლითობისთვის სისხლის სამართლის პასუხისმგებლობაც დააწესა. ამით შედეგად ის მივიღეთ, რომ თაღლითობას პიარი დაერქვა და შეიქმნა სპეციალური სასწავლებლები და კურსები ისეთი ხელოვნების დასაუფლებლად, როცა პიარის სპეციალისტს შეუძლია თეთრი შავად მოგაჩვენოს და ამით დიდი სარგებელი ნახოს.

სამწუხაროდ, ნივთების პიარმა ფეხი მოიკიდა პიროვნებათა შეფასებების სფეროშიც და ისეთი სიტუაცია შეიქმნა, რომ ფსიქიატრიულ საავადმყოფოშიც კი ვეღარ არჩევენ, ვინ მკურნალია და ვინ-პაციენტი. დამსახურებულ ადამიანებს საზოგადოება ვერ იცნობს, ხოლო ზოგიერთი დაუმსახურებლად ლამის ვარსკვლავებად წარმოგვიდგინონ.

ქარაფშუტათა გენიოსად წარმოჩენა ასნებოვნებს ადამიანთა აზროვნებას და შეუძლებელს ხდის გაპიარებულთა ფასეულობათა გამოფხვანას.

მე მინახავს და გამიგონია ისეთ ადამიანთა განდიდება, რომელთა წარსული სამარცხინო ლაქად უნდა გაყვეს მათ, მაგრამ, ფარისეველთა ლაქუცის გამო, უცოდველ და გენიოს პიროვნებად წარმოგვიდგებიან.

სამწუხაროა, რომ ამ სიმახინჯემ ფეხი მოიკიდა საზოგადოებრივი ცხოვრების ისეთ სფეროშიც, როგორცაა სპორტი.

მართალია სპორტის ყველა სახეობის წესებისა და ილეთების ნიუანსებში ვერ ვერკვევი, მაგრამ ყოველთვის პატივს ვცემდი და ვცემ სპორტსმენთა ასპარეზობის პატიოსან შეფასებას. ადრეულ წლებში, არ ვიცი, იყო თუ არა მსაჯების მოსყიდვის, სხვადასხვაგვარი ჩაწობების და სამედიცინო პრეპარატების მიღების პრაქტიკა, მაგრამ ის კი ვიცი, რომ შერკინებული გამარჯვებულ-დამარცხებული სპორტსმენები, პოლიტიკოსებისგან განსხვავებით, კოცნით შორდებოდნენ ერთმანეთს და არა - მტრულად.

სამწუხაროდ, სპორტული ცხოვრების ბოლო წლების მოვლენებმა გამარჯვება-დამარცხების ხიბლი გააუფერულა. საეჭვო გახდა სპორტსმენთა გამარჯვება პატიოსანი ბრძოლის შედეგია თუ მომსყიდველობის. იყო დრო, რომ ამაზე ვერც იფიქრებდა ადამიანი, მაგრამ დადგა დრო, რომ ასეთი სიმახინჯე ფაქტად იქცა.

ამ წერილით მინდა, რაიონის მოსახლეობას წარმოეჩინო სოფელ ოძისში 1936 წელს დაბადებული და აღზრდილი, სასიქადულო სპორტსმენი და მამულიშვილი ბატონი გმირა ( დაბადების მოწმობით გმირი) დავითის ძე ხაჩიძე, რომელმაც სოფლის მინდორზე ფეხშიშველა მოჭიდავიდან პატიოსნად გაიკვლია გზა სპორტული მიღწევების მწვერვალებამდე.

მისდა სასახელოდ, მიუხედავად ცხოვრების სირთულეებისა, არასოდეს უღალატია ადამიანური, მორალური და ზნეობრივი ღირებულებებისთვის. მოკრძალებულად ცხოვრობს თავის გარემოცვაში და არასოდეს თავისი თავი, სხვასთან შედარებით, განსხვავებულ პიროვნებად წარმოედგინა. ადამიანებთან დამოკიდებულებაში არის ყველას თანატოლი, უადრესად გულთბილი და თავაზიანი. არასოდეს დაუკარგავს წონასწორობა, ერთნაირად დინჯი და ბრძენ-მეტყველია სუფრასთანაც, ჭირშიც და ლხინშიც.

ზუსტად ასეთი მოკრძალებულობის ბრალია, რომ ამ პიროვნებას და სპორტსმენს ნაკლებად იცნობს ჩვენი რაიონის მოსახლეობა.

ბატონ გმირას არასოდეს იზიდავდა ზედმეტი ყურადღება, არასოდეს ცდილობდა მისი პორტრეტებით ატრელებულიყო პრესის ფურცლები, ალაპარაკებულიყო ტელევიზია, პოპულარიზაცია გაეწია ქვეყნის წინაშე დამსახურებითთვის, მოეწყო საჩვენებელი შეხვედრები, მაღალი დონის წარმომადგენლობით დონისძიებაზე ყოფილიყო წინა რიგებში ან მაღალი რანგის ხელმძღვანელთა გვერდით.

მის ასეთ პიროვნებად ჩამოყალიბებაში უდიდესი როლი ითამაშა ოჯახური ცხოვრების ისეთმა პირობებმა, სადაც ლუკმა-პურის ფასი იცინა.

მისი ბავშვობის პერიოდი დაემთხვა ქვეყნისთვის უმძიმეს, მეორე მსოფლიო ომის წლებს.

ოჯახში, სადაც ექვსი და-ძმა იზრდებოდა, რა თქმა უნდა, არ იყო საკმარისი საჭმელ-სასმელი, სამოსელი და ა.შ. მაგრამ იყო ურთიერთსიყვარული, ზრუნვა, ლუკმის გაზიარება, ტახტზე ერთ ღოვინში რამდენიმე ბავშვის ძილი, ოჯახური მეურნეობის წარმოება, მწვემსობა, რამდენჯერმე დაკერებული ტანსაცმელ-ფეხსაცმლით სიარული, სასწავლო ნივთების ნაკლებობა, სტუმარ-მასპინძლობა და ა.შ.

ამ უმძიმეს წლებში, პატარა ბიჭუნას ვაჟკაცურად შრომის დასტურია ის, რომ 1948 წელს 12 წლის ასაკში იგი დაჯილდოვდა მედლით „ზურგში მამაცური შრომისათვის“.

როცა ოჯახი წელში უნდა გამართულიყო, თავს დაატყდათ უბედურება, ერთი წლის განმავლობაში ტრაგიკულად დაიდუნენ მამა და ოცი წლის უფროსი ძმა.

გმირას, როგორც უკვე უფროს ძმას, დედასთან, ქალბატონ მარიამთან ერთად, დააწვა მცირეწლოვანთა აღზრდისა და ოჯახის მართვის სიმძიმეები, რასაც ძნელად, მაგრამ ვაჟკაცურად უმკლავდებოდნენ.

დრო თავისას აკეთებდა. ახალგაზრდა გმირამ მუშაობა დაიწყო რუსთავის მეტალურგიულ ქარხანაში და სწავლა გააგრძელა ინდუსტრიულ ტექნიკუმში.



დადგა მის ცხოვრებაში რადიკალური გარდატენის წლები. იგი გაიწვიეს საბჭოთა არმიის რიგებში, სადაც დაიწყო მისი სპორტული კარიერის აღმავლობა და ასპარეზი მიეცა სპორტული შესაძლებლობების გამომჟღავნებას.

ძალიან შორს წაგვიყვანდა ასპარეზობის წლების, ადგილების და ა.შ. მითითება, თუმცა, წარმატებათა მშრალად ჩამონათვალის ნათელ წარმოდგენას შეგვიქმნის სპორტული ბრძოლით განვლილი გზების შესახებ.

ასე მაგალითად:

- იგი არის ცსკ (საბჭოთა არმიის ცენტრალური სპორტული კლუბი) ორგზის ჩემპიონი და ცხრაგზის პრიზიორი ჭიდაობა სამბოში;

- სსრ კავშირის სამგზის პრიზიორი ჭიდაობა სამბოში;

- ამიერკავკასიის ჯარების თორმეტგზის ჩემპიონი თავისუფალ ჭიდაობასა და სამბოში;

- საქართველოს ჩემპიონი თავისუფალ და ქართულ ჭიდაობაში;

- ქ. თბილისის ჩემპიონი თავისუფალ ჭიდაობაში;

- არის სამი სახეობის სპორტის ოსტატი, სამბოს, თავისუფალ ჭიდაობასა და ქართულ ჭიდაობაში.

ბატონმა გმირამ თავისი შემოქმედებითი ცხოვრებიდან 30 წელი შეაღია მომავალი თაობის სპორტულ-აღმზრდელით მუშაობას. ამ წლების განმავლობაში, იყო სპორტსაზოგადოება „დინამოს“ უფროსი მწვრთნელი და აღზარდა 74 (სამოცდა-ოთხმეტი) სპორტის ოსტატი და კანდიდატი ძიუდოსა და სამბოში, 8 მსოფლიო პრიზიორი და ჩემპიონი, მრავალი სხვადასხვა დონის შეჯიბრებათა პრიზიორი, ასევე საქართველოს 10 დამსახურებული მწვრთნელი.

იგი მუშა ფუტკარია და ბედნიერებას შრომაში ხედავს, არ მიიღტვოდა მაღალი თანამდებობების დასაკავებლად, თორემ, ასეთი ავტორიტეტის პირისთვის ეს სრულიად შესაძლებელი იქნებოდა.

მისი მოკრძალებული, კეთილსინდისიერი და მრავალწლიანი მოღვაწეობა აღიარებულია სახელმწიფოს მიერ. იგი არის „ღირსების ორდენის კავალერი, დაჯილდოებულია „დინამოს“ საპატიო ორდენით, მინიჭებული აქვს საქართველოს სპორტის დამსახურებული მუშაკის საპატიო წოდება, არის დამსახურებული მწვრთნელი სამბოსა და ძიუდოში, ასევე რესპუბლიკური კატეგორიის მსაჯი ჭიდაობის მრავალ სახეობაში.

მიღებული აქვს მრავალი ჯილდო - წახალისება, საჩუქრები, სიგელები და ა.შ. რომელიც შეიძლება აიწონოს და არა - დაითვალოს.

ამ შესანიშნავ პიროვნებას ღირსეული მეუღლეობა გაუწია ქალბატონმა ლენა კუჭაძემ, რომელიც 60 წლის ასაკში გარდაიცვალა, მაგრამ ოჯახში დატოვა საუკეთესო შთამომავლობა.

მათი ოჯახში აღიზარდა მეცნიერებათა ორი დოქტორი და პროფესორი. ქალბატონი მანანა ხაჩიძე არის ი. ჯავახიშვილის სახელობის უნივერსიტეტის კომპიუტერული მეცნიერების კათედრის გამგე და საქართველოს მეცნიერებათა აკადემიის აკადემიკოსი.

მეორე შვილი, ბატონი დავითი ფიზიკის მეცნიერებათა დოქტორი, პროფესორი, მოღვაწეობს ი. ჯავახიშვილის სახელობის უნივერსიტეტსა და ფიზკულტურის ინსტიტუტში. არის ჭიდაობა სამბოს ფედერაციის ვიცეპრეზიდენტი და იგივე სახეობის საერთაშორისო კატეგორიის მდივანი, სპორტის ოსტატი, საქართველოს დამსახურებული მწვრთნელი და საქართველოს ჩემპიონი სამბოში.



შვილი შვილებიდან კი ნიამ ოქროს მედალზე დაამთავრა საშუალო სკოლა, წითელ დიპლომზე კი სამედიცინო ინსტიტუტი. ამჟამად სწავლას აგრძელებს ნორვეგიაში.

ნიკოლოზმა დაამთავრა მაგისტრატურა შედეგით. სპეციალობით არის ქიმიკოსი და ამჟამად მუშაობს თბილისში ფიზიკის ინსტიტუტში. არის საქართველოს ჩემპიონი ჭიდაობა სამბოში.

ნანი სწავლობს მე-11 კლასში და ამავე დროს ამერიკის შეერთებული შტატების ერთ-ერთ სასწავლებელში.

ჩვენი ღირსეული თანამემამულე, გმირა ხაჩიძე ამჟამად ცხოვრობს თბილისში, სოფელ ოძისში კი მამა-პაპულ ეზოში აქვს სახლი, სადაც ხშირად ატარებს ზაფხულის თვეებს.

მისი სოფლის და რაიონის მოსახლეობამ კი ძალიან ცოტა იცის, თუ რა ღირსეული პიროვნება აღიზარდა მის წიაღში.

ამ წერილით შევეცადე ცოტათი მაინც შემეხსოვს ეს ხარვეზი.

მადლობას მოვახსენებ გაზეთის „ხაშურის მოამბე“ რედაქციას ასეთი საშუალების მოცემისთვის.

რევაზ გრიგალაშვილი



### კონკურსის გამარჯვებულები გამოვლინდნენ

ხაშურის მუნიციპალიტეტში გამართულ კონკურსში, „ჯანსაღ სხეულში ჯანსაღი სულია“ გამარჯვებული გუნდი გამოვლინდა.

ფინალში ხაშურის №2, №9 და სურამის №1 საჯარო სკოლის გუნდები მონაწილეობდნენ. გამარჯვება საბოლოო ჯამში, ხაშურის №2 საჯარო სკოლის გუნდს ერგო.

გამარჯვებული გუნდის წევრებს დიპლომები და საჩუქრები გადასცეს, ხაშურის მუნიციპალიტეტის მერის მოადგილემ ზურაბ ჩხიტიანიმ, მერიის ჯანმრთელობის დაცვისა და სოციალური უზრუნველყოფის სამსახურის უფროსმა გიორგი ცერცვაძემ, ა(ა) იპ „საზოგადოებრივი ჯანდაცვის ცენტრის“ ხელმძღვანელმა და ვითო ჩიქოვანმა და ცენტრის სხვა თანამშრომლებმა.

კონკურსი, რომლის მიზანიც, მოსწავლე-ახალგაზრდებში, ჯანსაღი ცხოვრების წესის პოპულარიზაცია და დანერგვაა, შეჯამება იმ განვლილი მასალის, რომელსაც ა(ა) იპ „საზოგადოებრივი ჯანდაცვის ცენტრის“ თანამშრომლები სისტემატურად ავრცელებენ მუნიციპალიტეტის საჯარო სკოლებში.



### ლონისძიება კონსტიტუციური ღირებულებების შესახებ

„კონსტიტუცია ყველასია“ - ამ სახელწოდებით, 25 დეკემბერს, ხაშურის მუნიციპალიტეტის ბიბლიოთეკის სამკითხველო დარბაზში ღონისძიება გაიმართა, რომლის მიზანიც იყო კონსტიტუციისა და კონსტიტუციური ღირებულებების შესახებ მოსწავლეებში ცნობიერების ამაღლება.

ღონისძიება გახსნა ბიბლიოთეკის დირექტორმა, მაკაიდიფილიძემ. სხვადასხვა საჯარო სკოლების მოსწავლეებმა წარმოადგინეს პრეზენტაციები:

- „ადამიანთა ძირითადი უფლებები“ - ია მუმლაძე, ნათია განჯელაშვილი (IV საჯარო სკოლა);
- „კონსტიტუცია და რელიგია“ - ანანო მჭედლიშვილი, ნიკა ბარბაქაძე, მაიკო ფცქიალაძე (I საჯარო სკოლა);
- „საქართველოს კონსტიტუცია“ - ანა გელაშვილი (VI საჯარო სკოლა);

პრეზენტაციების წარდგინების შემდეგ, ღონისძიება გადავიდა კითხვა-პასუხის რეჟიმში. მოსწავლეების შეკითხვებს უპასუხეს ხაშურის საგანმანათლებლო რესურსცენტრის ხელმძღვანელმა ზვიად გოგუაძემ და იურისტმა ლაშა მესხმა.

ღონისძიება მომზადდა ხაშურის საგანმანათლებლო რესურსცენტრის მხარდაჭერით.

### სამოქალაქო ცნობიერების ამაღლების მიზნით

ქალაქ ხაშურის საგანმანათლებლო რესურსცენტრის უფროსის ინიცირებით წამოწყებული „სამოქალაქო ცნობიერების ამაღლების კამპანიის“ ფარგლებში, ქალაქ ხაშურის საგანმანათლებლო რესურსცენტრში პირველი შეხვედრა გაიმართა, რომელსაც რესურსცენტრს დაქვემდებარებული საჯარო და კერძო ზოგადსაგანმანათლებლო დაწესებულებების მოსწავლეები ესწრებოდნენ.

პირველი შეხვედრაზე მოსწავლეებს გადაეცათ „ლიდერის მოწოდება“, ხოლო შეხვედრის თემა საორგანიზაციო საკითხების გადაწყვეტა და პირველი სამუშაო თემის შერჩევა იყო; ლიდერები ერთხმად შეთანხმდნენ, რომ პირველი სამუშაო თემა იქნებოდა -სასკოლო ძალადობა. (ბულინგი/მოზინგი)

კამპანიის ფარგლებში, რესურსცენტრი, სკოლის ლიდერებთან ერთად, გეგმავს ზოგადსაგანმანათლებლო დაწესებულებების IX - XII კლასის მოსწავლეებისთვის სემინარების/ტრენინგების ჩატარებას ან თავისუფალ საუბრებს, მოსწავლეთა სამოქალაქო ცნობიერების ამაღლების მოტივით, ისეთ თემებზე როგორცაა: „ბულინგი/მოზინგი“ „დისკრიმინაცია“ „ოჯახში ძალადობა“, „ნარკოტიკული დანაშაულების ანალიზი“, „სუბკულტურები საქართველოში“, „არაფორმალური განათლება“, „სკოლის თვითმმართველობის გაძლიერება“ და სხვ.

აღსანიშნავია, რომ ზემოაღნიშნულ კამპანიაში აქტიურ მონაწილეობას მიიღებენ სამოქალაქო განათლების მასწავლებლები და დამრიგებლები. კამპანია, 2018 წლის განმავლობაში გაგრძელდება.



### ხაშურის მუნიციპალიტეტის მერია მერის ბრძანება

გამარტივებული კონკურსის საფუძველზე, შრომითი ხელშეკრულებით, ხაშურის მუნიციპალიტეტის მერის თანაშემწის თანამდებობაზე მერაბ ბარბაქაძის მიღების შესახებ საქართველოს ორგანული კანონის „ადგილობრივი თვითმმართველობის კოდექსის“ 61-ე მუხლის 2-3 პუნქტის „ა“ ქვეპუნქტის, საქართველოს „საჯარო სამსახურის შესახებ“ საქართველოს კანონის პირველი თავის მე-3 მუხლის „ვ“ ქვეპუნქტის, საქართველოს მთავრობის 2017 წლის 21 აპრილის №204 დადგენილების - „საჯარო სამსახურში კონკურსის ჩატარების წესის შესახებ“ შესაბამისად და ხაშურის მუნიციპალიტეტის მერიის გამარტივებული კონკურსის 2017 წლის 27 დეკემბრის ოქმი №3-ის საფუძველზე ვბრძანებ:

1. გამარტივებული კონკურსის საფუძველზე, შრომითი ხელშეკრულებით, ხაშურის მუნიციპალიტეტის მერიის თანაშემწის თანამდებობაზე მიღებულ იქნეს მერაბ ბარბაქაძე 2017 წლის 29 დეკემბრიდან 2018 წლის 31 დეკემბრის ჩათვლით;
2. ბრძანება წარმოადგენს ხელშეკრულების განუყოფელ ნაწილს;
3. ბრძანება ეცნობოს: მერაბ ბარბაქაძეს;
4. ბრძანება ეცნობოს: ხაშურის მუნიციპალიტეტის მერიის ადმინისტრაციულ და საბიუჯეტო სამსახურებს;
5. ბრძანება ძალაში შედის ხელმოწერისთანავე და შეიძლება გასაჩივრდეს დადგენილი წესით დაინტერესებული პირის მიერ ხაშურის რაიონულ სასამართლოში (ქ.ხაშური, კოსტავას ქ. №15) ერთი თვის ვადაში.

მუნიციპალიტეტის მერი გიორგი გურასაბაშვილი

### მერაბ ბარბაქაძე

დაიბადა 1957 წელს. დაამთავრა რკინიგზის ხაშურის V საშუალო სკოლა, შემდეგ კი ოდესის კვების მრეწველობის ინსტიტუტი (1979წ.) ინჟინერ-ტექნოლოგის სპეციალობით და გორის ეკონომიკის უნივერსიტეტი (2002წ.) ეკონომისტის სპეციალობით. 1983-1991 წლებში იყო რაისაბჭოს აღმასკოვის ინსტრუქტორი და საორგანიზაციო განყოფილების გამგე. 1991-99 წლებში ხაშურის პრეფექტურის (გამგეობის) კანცელარიის მმართველი და აპარატის უფროსი. 1999-2001 წლებში მუშაობდა ხაშურის ზონალური საგადასახადო ინსპექციაში განყოფილების უფროსად. 2001-2003 წლებში იყო ქონების მართვის რაიონული სამმართველოს უფროსი. 2003 წლიდან იყო კერძო ბიზნესში. ჰყავს მეუღლე და სამი შვილი.



### დაჯილდოვდნენ წარმატებული სტუდენტები

ხაშურის მუნიციპალიტეტში მცხოვრები სტუდენტები, რომლებმაც 2017 წელს წარმატებით ჩააბარეს ერთიანი ეროვნული გამოცდები და მიიღეს 100% გრანტი, ფულადი ჯილდოებით და დიპლომებით დასაჩუქრდნენ.

სტუდენტებს წარმატება მიულოცეს და დიპლომები პირადად გადასცეს ხაშურის მუნიციპალიტეტის მერმა გიორგი გურასაშვილმა, საკრებულოს თავჯდომარემ მიხეილ ჯანაშვილმა და განათლების, კულტურის და სპორტის სამსახურის უფროსმა კონსტანტინე ფრუიძემ.

მუნიციპალიტეტის ხელმძღვანელმა პირებმა ახალგაზრდებს მომავალ საქმიანობაში თანადგომა აღუთქვეს და ქვეყნის სასიკეთოდ, ნამდვილ პროფესიონალებად ჩამოყალიბება უსურვეს.

ერთიან ეროვნულ გამოცდებში, წარმატებული სტუდენტების წახალისება ხაშურში უკვე ტრადიციულ ხასიათს ატარებს.



### აღნიშნეს მნიშვნელოვანი საიუბილეო თარიღები

2017 წლის 25 დეკემბერს სრულიად საქართველოს კათოლიკოს – პატრიარქის, უწმინდესისა და უნეტარესის ილია II – ის აღსაყდრებიდან 40 წელი შესრულდა. ასევე წელს აღინიშნება ქართული მართმადიდებელი ეკლესიის



ავტოკეფალიის 100 წლის იუბილევ და 4 იანვარს, 85 წელი შეუსრულდა ჩვენს პატრიარქს.

ამ ღირსშესანიშნავ თარიღს, საქართველოს მამულებით, არაერთი საზეიმო ღონისძიებები მიეძღვნა. სწორედ ამიტომ, ხაშურის ბავშვთა და მოზარდთა შემოქმედებითი განვითარების ცენტრში, საშობაო საღამო „შობის მახარებლები“ გაიმართა, რომელიც რელიგიისა და ისტორიული ძეგლებს შემსწავლელი წრის ხელმძღვანელმა, თამარ გოგალაძემ ამავე წრის წევრებთან ერთად წარმოადგინა.

საღამო პატრიარქის თბილი მილოცვებით დაიწყო. მოსწავლეებმა საინტერესოდ და სიღრმისეულად წარმოადგინეს „მაცხოვრის შობა,“ მსმენელი დაატყბეს საშობაო საგალობლების ტკბილი ჰანგებით და რელიგიურ თემებზე შექმნილი პოეზიით.

ღონისძიების მიწურულს, მოსწავლეებმა შეასრულეს „ალილოს“ საგალობელი და ამ ემოციურ ფონზე გამართა უძველესი ტრადიცია - „ალილო,“ შეგროვდა საახალწლო ტკბილეული, რომელიც ქველმოქმედებას მოხმარდა. ასევე, საღამოს მიწურულს, ცენტრის მენეჯერმა აღუქსანდრე ჯოჯიშვილმა სიგელები გადასცა რელიგიის წრის წევრებს.

საღამოს სტუმრობდნენ: ჩვენს ეპარქიაში მოღვაწე დეკანოზი კახაბერ ციცილაშვილი, შინდარის დედათ მონასტრის მორჩილები, ცენტრის თანამშრომლები და სხვა მოწვეული სტუმრები.

### პატარებს შობა-ახალი წელი მიულოცეს

საბავშვო ბიბლიოთეკასთან არსებული მუსიკალურ-თეატრალური სტუდიის პატარა მსახიობებმა, საშობაო ღონისძიება ჩაატარეს. მაყურებლის წინაშე ერთმანეთს ენაცვლებოდნენ სხვადასხვა ზღაპრის გმირები; სახურავის ბინადარი კარლსონი, პეპი, თოვლის დედოფალი, ბურატინო... პატარებმა გერმანული საშობაო სიმღერაც შეასრულეს და დიდი მოწონება დაიმსახურეს.

მნიშვნელოვანია, რომ სტუდიის მსახიობებმა ღონისძიებაზე სოციალურ სახლებში მცხოვრები თანატოლებიც დააპატიეს და გაამხიარულეს.

რადგან თოვლის ბაბუამ ჩამოსვლა „დაავიანა“, წარმოდგენის ბოლოს, მსახიობებს და მათ თანატოლებს, საახალწლო ტკბილეული დრამატული წრის ხელმძღვანელებმა- ნონა ტეფნაძემ და ნათია ბარბაქაძემ დაურიგეს.

აღსანიშნავია, რომ ხაშურის მუნიციპალიტეტის საბავშვო ბიბლიოთეკა, ყოველთვის საინტერესო და სითბოთი სავსე ღონისძიებების ორგანიზატორი და მასპინძელია.



მოსწავლეებს. საუბარი მიმდინარეობდა ბულინგის თემაზე კითხვა-პასუხის რეჟიმში. შეხვედრები ხაშურის მუნიციპალიტეტის სკოლების მოსწავ-

### მოსწავლეები ბულინგის თემაზე მსჯელობენ

ლეებთან მთელი წლის განმავლობაში გაგრძელდება. განათლებისა და მეცნიერების მინისტრმა მიხეილ ჩხენკელმა შეხვედრების ციკლი „მოუხსინოთ მოსწავლეებს“ გასულ წელს დაიწყო, რომლის მიზანს მოსწავლეებისათვის უსაფრთხო და ჯანსაღი გარემოს უზრუნველყოფა წარმოადგენს. შეხვედრების პარალელურად, მიხეილ ჩხენკელის გადაწყვეტილებით, სამინისტროს მხრიდან დაგეგმილია მთელი რიგი პრევენციული, საინფორმაციო და საგანმანათლებლო აქტივობები. გაძლიერდება ფსიქოლოგიური ცენტრები და დაიხვეწება რეაგირების მექანიზმები. მინისტრის ინიციატივით, შემუშავდება სხვადასხვა პროგრამები, რომელშიც ჩართულები იქნებიან თავად მოზარდები, ბავშვები, ვის მიმართაც ზემოაღნიშნული აქტივობებია მიმართული.



საქართველოს განათლებისა და მეცნიერების მინისტრის ინიციატივით, „მოუხსინე მოსწავლეს“ კამპანიის ფარგლებში, ქალაქ ხაშურის საგანმანათლებლო რესურსცენტრის თანამშრომლები შეხვდნენ სსიპ-ქალაქ ხაშურის 7 საჯარო სკოლის, სოფელ ცხრაშუხის და ქვიშხეთის საჯარო სკოლების

**D განცხადება**  
შევისყიდი კაკლის ხეს (მოსაჭრელი). ფასი შეთანხმებით.  
ტელ: 551 - 16 - 19 - 84. იკითხეთ დათო.

ა(ა)იპ ხაშურის მუნიციპალიტეტის გაზეთი „ხაშურის მოამბე“. დირექტორი გიორგი გოგალაძე, მისამართი: ხაშური, ტაბიძის ქუჩა №2. ტელეფონი: 24 30 27.  
E-mail [Khashurismoambe2015@gmail.com](mailto:Khashurismoambe2015@gmail.com) მიმღების დასახელება: ხაზინის ერთიანი ანგარიში, საიდენტიფიკაციო კოდი 443860984, სახელმწიფო ხაზინა TRESGE22, სახაზინო კოდი: 749547499.  
D-ით მონიშნული სტატია იბეჭდება დაკვეთით გაზეთი იბეჭდება თბილისში. რედაქტორი რობერტ სუხიაშვილი.